



**TENAGA  
NASIONAL BERHAD**

1/2

**Kosmo!**

|        |               |           |        |
|--------|---------------|-----------|--------|
| TARIKH | 2 / 11 / 2013 | MUKASURAT | 2      |
| HARI   | SABTU         | RUANGAN   | NEGARA |

MB Pahang akui pekebun tidak beretika tarah bukit sampai gondol

# Hakisan di Cameron Highlands teruk

Oleh HAFIZ ABBAS  
mohdhafiz.abbas@kosmo.com.my

KUANTAN - Kerajaan Pahang mengakui sukar untuk membendung perlakuan tidak beretika sesetengah pekebun

**Eksklusif**

sayur dan bunga yang mena-  
rah bukit sewenang-wenang-nya hingga mengakibatkan tanah tinggi Cameron Highlands kini mengalami masalah hakisan tanah sangat teruk.

Menteri Besar, Datuk Seri Adnan Yaakob berkata, masalah tersebut hanya boleh diatasi jika mereka memiliki kesedaran tinggi untuk memulihara alam sekitar dan bukan memikirkan keuntungan semata-mata.

Beliau berkata, kerajaan mempunyai had tertentu untuk menyekat aktiviti pekebun itu kerana yang selebihnya, ia terpulang kepada penduduk berkenaan.

"Saya akui kerakusan itu nyata. Masa terbang dengan helikopter baru-baru ini pun saya lihat keadaan hakisan memang teruk kerana boleh dikatakan kebanyakan bukit di sana telah ditarah.



KERATAN Kosmo! semalam.

**Saya akui kerakusan itu nyata. Masa saya terbang dengan helikopter baru-baru ini pun saya lihat keadaan hakisan tanah memang teruk**



ADNAN YAAKOB

"Mereka merupakan penduduk di situ. Sekarang mereka kena tepuk dada tanya selera. Adakah mereka pilih untuk buat amalan pertanian yang buruk atau menyayangi alam sekitar? Terpulanglah," katanya.

Beliau menyatakan demikian kepada pemberita selepas Majlis Ramah Mesra Menteri Besar Pahang Bersama Pemain dan Pengurusan Pasukan Pahang di Kompleks Yayasan Pahang di sini semalam.

Kosmo! semalam melaporkan kawasan peranginan Cameron Highlands di Pahang kini berdepan dengan kemungkinan bencana alam dahsyat apabila 4,000 kawa-

san seluas 4,272 hektar yang menyamai 10,432 padang bola sepak ditarah untuk dijadikan kebun sayur secara haram.

Adnan berkata, ia bukan isu baharu dan kerajaan negeri telah pun berusaha melakukan pemantauan bagi membendung masalah itu, tetapi ia tetap berbalik kepada kesedaran pekebun sayur dan bunga itu.

"Kita sukar untuk terapkan pendidikan dalam kalangan penanam-penanam sayur dan bunga di Cameron Highlands kerana kalau kita buat kenyataan keras, mereka kata kita tidak bersimpati dengan mereka," katanya.

Beliau menambah, bencana banjir lumpur akibat limpahan air empangan yang meragut empat nyawa baru-baru ini seharusnya dijadikan iktibar oleh pihak terlibat agar ia tidak berulang.

Menurutnya, semasa operasi pembersihan dijalankan, pelbagai barangan seperti peti televisyen buruk, peti sejuk buruk, tilam, tong, sofa dibuang di situ.

"Jadi, setakat mana kita boleh teruskan operasi? Ini terpulang kepada penduduk sendiri untuk memiliki kesedaran.

"Empangan terbabit melimpah kerana mendapan tetapi kalau empangan itu pecah? Nauzubillah," tegasnya.

|        |           |           |        |
|--------|-----------|-----------|--------|
| TARIKH | 2/11/2013 | MUKASURAT | 2      |
| HARI   | SABTU     | RUANGAN   | NEGARA |



SEBAHAGIAN hutan di Kampung Terla, Cameron Highlands gondol akibat aktiviti penehrokaan kebun sayur.